



Broj: X-K/08/598-1
Sarajevo, 16.02.2009. godine

U IME BOSNE I HERCEGOVINE

Sud Bosne i Hercegovine, sudija Mehmed Šator uz sudjelovanje pravnog saradnika Bojana Avramovića, u krivičnom predmetu protiv optuženog Tahirović Senada, zbog krivičnog djela krijumčarenje osoba iz člana 189. stav 1. a u vezi sa članom 29. stav 1. KZ BiH, povodom optužnice Tužilaštva Bosne i Hercegovine broj: KT-453/06 od 29.10.2008. godine, nakon održanog ročišta za razmatranje sporazuma o priznanju krivnje i pretresa za izricanje krivičnopravne sankcije, u prisustvu tužitelja Tužilaštva Bosne i Hercegovine Harij Furlana, optuženog Tahirović Senada i njegovog branioca Midžić Ilijasa, advokata iz Bihaća, donio je i javno objavio, dana 16.02.2009. godine, slijedeću:

PRESUDU

OPTUŽENI TAHIROVIĆ SENAD, sin Muharema i majke Džemile, rođene Beganović, rođen 15.05.1967. godine u Cazinu, stalno nastanjen u ul. Hairlahovića brdo br.154, Općina Cazin, JMBG 1505967112486, državljanin BiH, nacionalnost Bošnjak, po zanimanju ugostitelj, služio vojsku, pismen, završena SSS, oženjen i otac jednog djeteta, osuđivan presudom Općinskog suda Cazin od 02.09.1998. godine za krivično djelo iz člana 181. stav 3. KZ SRBiH na kaznu zatvora u trajanju od četiri mjeseca uz uslovnu osudu na godinu dana, presudom Općinskog suda Cazin od 11.10.1999. godine za krivično djelo ugrožavanje okoliša napravama iz člana 304. stav 1. KZ FBiH, na kaznu zatvora u trajanju od pet mjeseci uz uvjetnu osudu na godinu dana, presudom Općinskog suda Cazin od 03.04.2007. godine, pravosnažna dana 01.05.2007. godine za krivično djelo protupravno lišenje slobode iz člana 179. stav 1. u sticaju sa krivičnim djelom iz člana 362. stav 1. KZ FBiH na kaznu zatvora u trajanju od tri mjeseca uz uvjetnu osudu na godinu dana i novčanu kaznu od 250,00 KM.

KRIV JE

Što je:

U prvoj polovini 2006. godine u Bihaću, u svojstvu direktora Kickboxing kluba Cazin, zajedno sa njemu poznatim osobama, po prethodnom dogovoru da radi ostvarivanja finansijske koristi, ilegalno prebacuju građane BiH u zemlje Zapadne Evrope i to tako, nakon što bi optuženi i njemu poznata osoba pronalazili lica zainteresirana za ulazak u zemlje Zapadne Evrope, te istima obećavali da će obezbjediti vize za ulazak u te zemlje uz naplaćivanje znatnih novčanih sredstava u iznosu od 500 do 1000 EURA, nakon čega bi Tahirović Senad, uz pomoć njemu poznate osobe obezbijedio članske karte Kickboxing kluba i sportske pasoše, a zatim ta osoba kao generalni sekretar ovog kluba sastavljao spiskove sa neistinitim podacima u pogledu statusa tih lica u sportskom KB savezu BiH, radi njihovog odlaska na navodna sportska takmičenja, navodeći da se radi o takmičarima, trenerima i sucima, a sve na osnovu lažnih sportskih pasoša, koja su uglavnom izrađivala nejemu poznata lica, uz prethodno obavljanje lažnog garantnog pisma-poziva World Sport Association i World Amater Arts Federation, na dan 14.07.2006. godine podnio zahtjev za izdavanje viza Ambasadi Velike Britanije u Sarajevu za 18 lica, kao učesnika u svestilskom seminaru za trenere, takmičare i suce na otvorenom Kickboxing šampionatu u Velikoj Britaniji, koji su navodno bili na programu od 23.07. do 27.08.2006. godine, ovlaštena službena lica Ambasade Velike Britanije, koja su vjerujući u istinitost prezentiranih podataka i odobrila vize za 18 lica BiH državljana i to:

- 1. Kaltak Husein-dobio vizu kao takmičar Reprezentacije KB Saveza BiH,*
- 2. Topić Amir- dobio vizu kao takmičar Reprezentacije KB Saveza BiH,*
- 3. Arnautović Derviš - dobio vizu kao takmičar Reprezentacije KB Saveza BiH,*
- 4. Macanović Dženana- dobila vizu kao takmičar Reprezentacije KB Saveza BiH,*
- 5. Rošić Edis- dobio vizu kao takmičar Reprezentacije KB Saveza BiH,*
- 6. Duratović Ismet- dobio vizu kao takmičar Reprezentacije KB Saveza BiH,*
- 7. Macanović Ramiz- dobio vizu kao takmičar Reprezentacije KB Saveza BiH,*
- 8. Semanić Ćazim- dobio vizu kao takmičar Reprezentacije KB Saveza BiH,*
- 9. Ćatić Hasan - dobio vizu kao takmičar Reprezentacije KB Saveza BiH,*
- 10. Rošić Elvis - dobio vizu kao takmičar Reprezentacije KB Saveza BiH,*
- 11. Okanović Senad - dobio vizu kao takmičar Reprezentacije KB Saveza BiH,*

12. Dizdarević Sulejman- dobio vizu kao takmičar Reprezentacije KB Saveza BiH,
13. Tahirović Senad- dobio vizu kao takmičar Reprezentacije KB Saveza BiH,
14. Ibričić Enes- dobio vizu kao takmičar Reprezentacije KB Saveza BiH,
15. Ahmetašević Hasan- dobio vizu kao takmičar Reprezentacije KB Saveza BiH,
16. Hodžić Hamo- dobio vizu kao sudac za Full c, Low c Reprezentacije KB Saveza BiH,
17. Seferović Enes- dobio vizu kao sudija Reprezentacije KB Saveza BiH,
18. Ljubijankić Ibrahim- dobio vizu kao sudac K-1 Reprezentacije KB Saveza BiH,

na koji način je omogućen nezakonit ulazak-prelazak granice bez poštivanja neophodnih uslova za zakonit ulazak u državu koja prima- tj. stvorili ovim licima uslove za nezakonit prijelaz državne granice, odnosno mogućnost da ova lica uđu u Veliku Britaniju kao takmičari, iako se ova lica nikada nisu bavila ovim niti drugim sportom.

***Dakle,** iz koristoljublja omogućio prelazak preko državne granice licima koja ne ispunjavaju za to uslove propisane zakonom.*

***Čime je** počinio krivično djelo krijumčarenja osoba iz člana 189. stav 1. a u vezi sa članom 29. stav 1. KZ BiH.*

Pa mu sud, primjenom člana 59. Krivičnog zakona Bosne i Hercegovine izriče

I

UVJETNU OSUDU

Kojom mu se utvrđuje kazna zatvora u trajanju od 2 (dvije) godine i istovremeno određuje da se ova kazna neće izvršiti ako optuženi u roku od 5 (pet) godina od dana pravosnažnosti ove presude ne počini novo krivično djelo, i

II

Na osnovu člana 41. stav 4. i 46. Krivičnog zakona BiH, kao sporednu kaznu, izriče

NOVČANU KAZNU U IZNOSU OD 15.000,00 KM (petnaest hiljada KM)

Novčanu kaznu u navedenom iznosu optuženi je dužan platiti u deset jednakih rata, u roku od 10 (deset) mjeseci od dana pravosnažnosti ove presude. Ukoliko optuženi u ovom roku ne plati novčanu kaznu, sud će u smislu člana 47. KZ BiH bez odlaganja donijeti odluku da mu se novčana kazna zamjeni kaznom zatvora, i to tako što će se za svakih započelih 50,00 KM novčane kazne odrediti jedan dan zatvora.

Na osnovu člana 186. stav 1. i 2 ZKP-a BiH optuženi se obavezuje da plati troškove krivičnog postupka, o čijoj visini će sud odlučiti naknadno, nakon što pribavi potrebne podatke.

O b r a z l o ž e n j e

Tužilaštvo Bosne i Hercegovine, optužnicom broj: KT-453/06 od 29.10.2008. godine, optužilo je Tahirović Senada, za krivično djelo krijumčarenje osoba iz člana 189. stav 1., a u vezi sa članom 29. stav 1. KZ BiH. Optužnica je od strane sudije za prethodno saslušanje ovog Suda potvrđena dana 04.11.2008. godine.

Dana 10.02.2009. godine optuženi Tahirović Senad i njegov branilac Midžić Ilijas, advokat iz Bihaća, su sa tužiteljem Tužilaštva Bosne i Hercegovine, Harij Furlanom, zaključili sporazum o priznanju krivnje po kome optuženi priznaje krivnju za djelo koje mu je stavljeno na teret, te prihvata da mu se za isto izrekne dogovorena kazna-uslovna osuda, tako što će mu se utvrditi kazna zatvora u trajanju od 2 (dvije) godine zatvora, s tim da se ista neće izvršiti ako optuženi u roku od 5 (pet) godina od dana pravosnažnosti ove presude ne počini novo krivično djelo i novčana kazna u iznosu od 15.000,00 KM. Takođe, optuženi se obavezao da će svjedočiti o svim činjenicama koje su mu poznate u ovom krivičnom predmetu krijumčarenja osoba kao i o svim izvršiocima, saizvršiocima i pomagačima tog djela koja su njemu poznata i u kojim je eventualno i sam sudjelovao.

Predmetni sporazum Sud je razmotrio u smislu člana 231. Zakona o krivičnom postupku Bosne i Hercegovine, te isti prihvatio na ročištu održanom dana

16.02.2009. godine. Navedeni sporazum Sud je prihvatio nakon što je utvrdio da je do zaključenja sporazuma došlo dobrovoljno, svjesno i sa razumijevanjem, da je optuženi upoznat o mogućim posljedicama zaključenja sporazuma o priznanju krivnje, uključujući i obavezu naknade troškova krivičnog postupka, te nakon što je Sud utvrdio da postoji dovoljno dokaza o krivnji optuženih.

Naime, optuženi je pred Sudom potpuno i nedvosmisleno izjavio da se osjeća krivim za djelo koje im je optužnicom stavljeno na teret, izvršeno na način i u vrijeme naveden u optužnici. Takođe je naglasio da u vrijeme zaključenja sporazuma na njega nije vršen bilo kakav pritisak da zaključi sporazum, te da je u to vrijeme kao i u vrijeme razmatranja sporazuma o priznanju krivnje potpuno svjesno, svojom voljom, zaključio sporazum i dao izjavu o priznanju krivnje. Sve navedeno, te izgled i ponašanje optuženog na predmetnom ročištu, doveli su Sud do uvjerenja da nema nikakve sumnje u pogledu slobodno izražene volje optuženog za zaključenje sporazuma o priznanju krivnje. Prilikom odlučivanja Sud je ocijenio da je optuženi razumio da se sporazumom odriče prava na suđenje i da ne može uložiti žalbu na krivičnopravnu sankciju, koja će mu se izreći. Uz to, optuženi je pregovarao o krivnji sa Tužilaštvom Bosne i Hercegovine, u prisustvu svog branioca, tako da je imao adekvatnu pravnu pomoć. Pored toga, optuženi je pred sudom nedvosmisleno potvrdio da je upoznat sa svim zakonskim posljedicama zaključenja sporazuma, koje pravne posljedice su mu i od strane suda neposredno predočene.

Da je optuženi zaista kriv za radnje i djelo koje priznaje, po ocjeni suda, proizilazi, ne samo iz njegovog priznanja, nego i iz dokaza dostavljenih uz optužnicu Tužilaštva BiH. Naime, ovakvu ocjenu o krivnji, sud zasniva na materijalno dokumentaciji i to, Izvještaju o počinjenom krivičnom djelu br. 05-1/03-2-63/06 od 07.12.2006. godine, dopune izvještaja o počinjenom krivičnom djelu br. 05-1/03-2-04-3-500/06 od 19.12.2006. godine, Dopisa Kantonalnog tužilaštva USK Bihać br. 1441/06 od 25.12.2006., Dopisa Granične policije BiH broj: 18-08-2-04-907/06 od 09.01.2007. godine Dopisa NCB Interpola Sarajevo broj: 16-3-04-4-IP-I-IM-4515/06-10 od 29.12.2006. godine, Naredbe o sprovođenju istrage broj: KT-453/06 od 27.12.2006. godine, Zapisnika o ispitivanju osumnjičenog Duratović Nisveta broj: KT-453/06 od 03.01.2007. godine, Zapisnika o ispitivanju osumnjičenog Tahirović Senada broj: KT-453/06 od 03.01.2007. godine, Zapisnika o saslušanju svjedoka Halilović Zijad broj: KT-453/06 od 03.01.2007. godine, Zapisnika o saslušanju svjedoka Arnautović Derviša broj: KT-1441/06 od 22.12.2006. godine, Zapisnika o saslušanju svjedoka Semanić Ćazima broj:

KT-453/06 od 12.07.2007. godine uz fotokopiju Rješenja Prekršajnog suda u Zadru broj: Pp XV JR-570/06 od 25.07.2006. godine, Zapisnika o saslušanju svjedoka Kaltak Husein broj: KT-1441/06 od 19.12.2006. godine, Zapisnika o saslušanju svjedoka Čatić Hasana broj: KT-1441/06 od 22.12.2006. godine, Zapisnika o saslušanju svjedoka Rošić Elvis broj: 05-1/03-2-14/07 od 08.01.2007. godine, Zapisnika o saslušanju svjedoka Topić Amira broj: 05-1/03-2-58/07 od 05.01.2007. godine, Naredbe za pretresanje od strane Općinskog suda u Cazinu broj: 020-0-Kpp-06-000013 od 27.11.2006. godine, Zahtjeva za izdavanje vize na ime Macanović Đenana, Zahtjeva za izdavanje vize na ime Macanović Ramiz, Zahtjeva za izdavanje vize na ime Seferović Enes, Zahtjeva za izdavanje vize na ime Kaltak Husein, Zapisnika o pretresanju stana, drugih prostorija i pokretnih stvari kod lica Tahirović Senad broj: 05-1/03-2-873/06 od 06.12.2006. godine, Zapisnika o pretresanju stana, drugih prostorija i pokretnih stvari kod lica Tahirović Senad broj: 05-1/03-2-867/06 od 06.12.2006. godine, Zapisnika o pretresanju osobe Tahirović Senada br. 05-1/03-2-868/06 od 06.12.2006. godine, Potvrde o privremenom oduzimanju predmeta od lica Tahirović Senada br.05-1/03-2-916/06 od 22.12.2006. godine, Odluke o izboru članova Predsjedništva Udruženja građana Klub borilačkih vještina Cazin, Zapisnika o radu Osnivačke Skupštine udruženja građana klub borilačkih vještina Cazin, Potvrde o privremenom oduzimanju predmeta od lica Tahirović Senada br.05-1/03-2-869-1/06 od 06.12.2006. godine, Pasoša serijskog broja 3467559 izdat od strane MUP-a USK dana 12.10.2002. godine i glasi na ime Tahirović Senad, Potvrde o privremenom oduzimanju predmeta od lica Tahirović Senada br.05-1/03-2-869/06 od 06.12.2006. godine, Pasoša broj: 4127470 na ime Čehić Jasmin iz Cazina, Okrugli pečat Fullcontact-karate-kickbox Zmaj od Bosne Stuttgart, Okrugli pečat Klub borilačkih vještina Cazin, Ispitna komisija, Štembilj Senad Tahirović Instruktor modernih sportova, Sportski pasoš na ime Amir Topić izdat 10.03.1999. godine, Sportski pasoš na ime Tahirović Senad bez fotografije izdat 10.03.2000. godine, Sportski pasoš na ime Derviš Arnautović izdat 12.03.2002. godine, Okrugli pečat Klub borilačkih vještina Cazin, ispitna komisija, Zapisnika o dobrovoljnom predavanju predmeta od osobe Asim Macanović broj: 05-1/03-2-897/06 od 14.12.2006. godine, Sportski pasoš Kickboxing Savez BiH na ime Ramiz Macanović izdat 10.10.2004. godine, Ovjerena fotokopija putne isprave br. 5011472 izdata od strane MUP-a USK Bihać, dana 07.03.2006. godine na ime Arnautović Derviš, uz potvrdu o vraćanju putne isprave licu Arnautović Dervišu broj: KT-453/06 od 20.10.2008. godine, Potvrda o dobrovoljnoj predaji predmeta od osobe Dizdarević Sulejman broj: 05-1/03-2-192/06 od 26.12.2006. godine, Putna isprava na ime Dizdarević Sulejman broj: 3455060 -poništena, Potvrda o privremenom oduzimanju predmeta od osobe Semanić

Čazim broj: 511-18-16-3-194/06 od 25.07.2006. godine , Fotokopija putne isprave na ime Semanić Čazim broj: 4996077 uz Naredbu o povratu putne isprave vlasniku broj: KT-453/06 od 12.07.2007. godine, Sportski pasoš Kickboxing saveza BiH na ime Čazim Semanić, Dopuna izvještaja o krivičnom djelu i izvršiocu protiv Senada Tahirovića i Čazima Semanića od strane JDGS Stremica, Bosansko Grahovo broj: 18-14-5-04-439-1-KU-1/06 od 03.08.2006. godine uz priloge skeniranih dokumenata, Skenirani dokumenti od osobe Duratović Ismet i to: stranice putne isprave broj 2 i 3, stranica broj 6 i 7 sa vizom za Veliku Britaniju broj vize 003014056, stranica broj 8 i 9 sa Šengen vizom broj 110174781 i skenirana članska knjižica Kickboxing saveza BiH , Skenirani dokumenti od osobe Ramiz Macanović i to: stranice putne isprave broj 2 i 3, stranica broj 6 i 7 sa vizom za Veliku Britaniju broj vize. 003014058, stranica broj 8 i 9 sa Šengen vizom broj 110174786 i skenirana članska knjižica Kickboxing saveza BiH i Fotodokumentacije pretresa porodične kuće vlasništvo Tahirović Senada u Cazinu, Hairlahovića brdo, dana 06.12.2006. godine.

U skladu sa naprijed navedenim, Sud je utvrdio da su u cjelosti ispunjene pretpostavke propisane članom 231. stav 4. Zakona o krivičnom postupku BiH za prihvatanje zaključenog sporazuma, te je nakon razmatranja istog donesena takva odluka, pa je istog dana, 16.02.2009. godine održao pretres za izricanje krivično pravne sankcije.

Po prihvatanju sporazuma o priznanju krivnje, Sud je pristupio izricanju krivičnopravne sankcije, pa je nakon izjašnjenja tužioca, optuženog i njegovog branioca, donio presudu kojom je optuženog oglasio krivim za krivično djelo krijumčarenje osoba iz člana 189. stav 1., a u vezi sa članom 29. stav 1. KZ BiH, ocjenjujući da je optuženi isto počinio s umišljajem (da je bio svjestan djela i htio njegovo izvršenje) i u stanju uračunljivosti.

Odlučujući o predloženoj krivičnopravnoj sankciji, Sud je kao olakšavajuće okolnosti kod optuženog ocijenio: priznanje da je izvršio krivično djelo koje mu se stavlja na teret, što je i rezultiralo zaključivanjem sporazuma o priznanju krivnje sa Tužilaštvom Bosne i Hercegovine, koja činjenica je doprinijela bržem i efikasnijem okončanju krivičnog postupka i smanjenju troškova; zatim, da se korektno držao pred Sudom; da je izrazio iskreno kajanje; te njegovu spremnost da svjedoči o činjenicama koje su mu poznate u krivičnom djelu krijumčarenje osoba. Sud je takođe kod optuženog kao olakšavajuću okolnost cijenio i njegove porodične prilike, odnosno činjenicu

da se radi o ocu jednog djeteta, dok je od otežavajućih okolnosti na strani optuženog Sud cijenio njegovu raniju osuđivanost.

Cijeneći sve naprijed navedeno, Sud je ocijenio da su izrečene krivičnopravne sankcije adekvatne učinjenom djelu i stepenu krivične odgovornosti optuženog, te da će se istom ostvariti svrha krivičnopravnih sankcija, kako prema optuženom, tako i prema ostalim potencijalnim počiniocima krivičnih djela, da ubuduće ne čine krivična djela, koja svrha je propisana članom 39. Krivičnog zakona BiH.

Prilikom izricanja novčane kazne, Sud je odredio da optuženi istu plati u roku od 10 mjeseci po pravomoćnosti presude, smatrajući to opravdanim, obzirom na finansijske i porodične prilike optuženog. Ukoliko optuženi u tom roku ne plati izrečenu kaznu, novčana kazna će se shodno članu 47. stav 3. ZKP-a BiH zamijeniti kaznom zatvora, tako da će za svakih započelih 50,00 KM odrediti jedan dan zatvora.

Na osnovu člana 188. stav 1. ZKP BiH optuženi Tahirović Senad je obavezan naknaditi troškove krivičnog postupka o čijoj visini će sud odlučiti naknadno, nakon što probavi potrebne podatake.

Zapisničar:
Bojan Avramović

SUDIJA
Mehmed Šator

POUKA O PRAVNOM LIJEKU: *Žalba na izrečenu krivičnopravnu sankciju nije dozvoljena, dok se presuda iz drugih razloga može pobijati žalbom, u roku od 15 dana od dana dostavljanja.*



Broj: X-K/08/598-1

Sarajevo, 25.02.2009. godine

Sud Bosne i Hercegovine, sudija Mehmed Šator u krivičnom predmetu protiv optuženog Tahirović Senada, zbog krivičnog djela krijumčarenje osoba iz člana 189. stav 1. a u vezi sa članom 29. stav 1. KZ BiH, postupajući u skladu sa članom 291. stav 1. Zakona o krivičnom postupku Bosne i Hercegovine („ZKP BiH“), dana 25.02.2009. godine, donio je slijedeće:

R J E Š E N J E

*Ispravlja se, presuda Suda Bosne i Hercegovine broj X-K/08/598-1 od 16.02.2009. godine, u dijelu koji se odnosi na odluku o uračunavanju pritvora optuženom Senadu Tahiroviću, **na način da u izreci iste treba da stoji** „Na osnovu člana 56. KZ BiH optuženom Senadu Tahiroviću se, u slučaju opoziva uslovne osude, u utvrđenu kaznu zatvora u trajanju od 2 (dvije) godine ima uračunati vrijeme provedeno u pritvoru, počev od 06.12.2006. godine do 22.01.2007. godine“.*

O b r a z l o ž e n j e

Presudom Suda Bosne i Hercegovine broj X-K/08/598-1 od 16.02.2009. godine optuženom Senadu Tahiroviću nakon zaključenog, a potom i prihvaćenog sporazuma o priznanju krivnje, izrečena je uslovna osuda, tako da mu je utvrđena kazna zatvora u trajanju od 2 (dvije) godine zatvora, s tim da se ista neće izvršiti ako optuženi u roku od 5 (pet) godina od dana pravosnažnosti ove presude ne počini novo krivično djelo i novčana kazna u iznosu od 15.000,00 KM.

Nakon donošenja i objave pomenute presude, utvrđeno je da je u izreci izvornika iste, a samim time i njenom pismenom otpravku, koji je dostavljen strankama napravljena pogreška tehničke prirode, koja se ogleda u propuštanju donošenja odluke o uračunavanju pritvora optuženom.

Uvidom u spis Sud konstatuje da je tada osumnjičenom Senadu Tahiroviću od strane Općinskog suda u Cazinu, rješenjem broj: 020-0-Kpp-06-000014 od 07.12.2006. godine određena mjera pritvora, koji pritvor je po ovom rješenju mogao trajati do 05.01.2007. godine. Nadalje, rješenjem broj: KPP-1/07 od 04.01.2007. godine od strane Suda BiH prema tada osumnjičenom Senadu Tahiroviću je takođe određena mjera pritvora u trajanju od mjesec dana, a koji se imao računati od vremena isticanja mjere pritvora određene prethodnim rješenjem Općinskog suda u Cazinu, a po kojem rješenju je pritvor trajao do 22.01.2007. godine, kada biva ukinut rješenjem suda BiH broj: KPP-01/07 od istog dana, a po prijedlogu Tužilaštva BiH.

Imajući u vidu navedene činjenice, Sud nalazi da je u presudi broj X-K/08/598 od 16.02.2009. godine, tehničkom omaškom propušteno odlučiti o istom, to se optuženom Senadu Tahiroviću, na osnovu člana 56. Krivičnog zakona Bosne i Hercegovine u slučaju opoziva uslovne osude, u utvrđenu kaznu zatvora u trajanju od 2(dvije) godine ima uračunati vremenski period koji je proveo u pritvoru i to, počev od 06.12.2006. godine do 22.01.2007. godine.

Slijedom navedenog, postupajući u skladu sa odredbom člana 291. stav 1. ZKP BiH, odlučeno je kao u dispozitivu rješenja.

SUDIJA
Mehmed Šator

POUKA O PRAVNOM LIJEKU: *Protiv ovog rješenja je dozvoljeno pravo žalbe vijeću Apelacionog odjeljenja Suda BiH u roku od 3 (tri) dana od dana prijema.*